



**KANTONALNI ZAVOD ZA ZAŠTITU
KULTURNO-HISTORIJSKOG I PRIRODNOG NASLIJEĐA
SARAJEVO**

INSTITUTE FOR THE PROTECTION OF CULTURAL-HISTORICAL
AND NATURAL HERITAGE OF CANTON SARAJEVO

Broj: 271-1/22

Datum: 11.2.2022.

ZAPISNIK

Sa 9. (devete) sjednice Upravnog odbora JU "Kantonalnog Zavoda za zaštitu kulturno-historijskog i prirodnog naslijeđa Sarajevo", održane u petak, 11.2.2022.godine u 15:30 sati, u prostorijama Zavoda.

Sjednici su prisustvovali: Azra Koldžo, predsjednica Upravnog odbora, članice Upravnog odbora Elša Turkušić-Jurić, Maida Šahinagić, Mirsada Škrijelj i Selma Karačević-Kapić, te Boris Trapara, direktor Zavoda.

Sjednicu je otvorila Azra Koldžo, predsjednica Upravnog odbora, konstatujući da su svi članovi Upravnog odbora prisutni, a da je materijal za sjednicu dostavljen elektronskim putem. Predložila je slijedeći Dnevni red na usvajanje:

DNEVNI RED

1. Usvajanje zapisnika sa 8. sjednice Upravnog odbora,
2. Usvajanje Programa rada sa finansijskim planom za 2022. godinu Zavoda,
3. Zahtjev za saglasnost Vlade i Ministarstva kulture i sporta za nova zapošljavanja na određeno i neodređeno vrijeme,
4. Zahtjev za saglasnost Ministarstva za ponudu izmijenjenih ugovora uposlenicima Zavoda,
5. Usvajanje Pravilnika o radu Zavoda,
6. Razno.

Dnevni red je jednoglasno usvojen

AD – 1 Prisutni su bez primjedbi i sugestija usvojili Zapisnik sa 8. (osme) sjednice Upravnog odbora održane 9.2.2022. godine.

AD – 2 Direktor je upoznao prisutne sa sadržajem Programa rada sa finansijskim planom za 2022.godinu, obrazlagajući sve pojedinačne tačke, naglašavajući da je isti rađen po zakonski definiranoj metodologiji. Normativni dio Programa rada podrazumijeva donošenje devet akata, u cilju poboljšavanja i usaglašavanja sa novim propisima. Direktor je naglasio da trenutno Zavod ne raspolaže stručnim saradnikom za pravne poslove, te da se planirane aktivnosti mogu realizirati tek po popunjavanju ovog radnog mjesta. Vezano za tematski dio Programa rada, direktor je obrazložio pojedinačno sve planirane projekte, koji podrazumijevaju izrade prijedloga pravne zaštite kulturnih dobara baštine, izložbe, klasifikacije dobara baštine, separate zaštite kulturne i prirodne baštine, izradu konzervatorsko-restauratorskih projekata (Despića kuća, obnova fasada), arheološka istraživanja, digitalizaciju, revizije i uspostavljanje novih registara baštine, te aktivnosti na uspostavi GIS baze podataka. Članovi Upravnog odbora istaknuli su da je Program rada ambiciozan u odnosu na raspoložive kapacitete Zavoda, te je postavljeno pitanje njegove izvodivosti. Direktor je obrazložio da Zavod trenutno radi sa umanjenim kapacitetima, ali da se sprovede aktivnosti na dobivanju potrebnih saglasnosti za popunjavanje upražnjenih radnih mjesta, te da je Program rada planiran imajući u vidu buduće saradnike. Također je naglasio da Zavod unutar budžeta raspolaže finansijskim



**KANTONALNI ZAVOD ZA ZAŠTITU
KULturno-HISTORIJSKOG I PRIRODNOG NASLIJEĐA
SARAJEVO**

INSTITUTE FOR THE PROTECTION OF CULTURAL-HISTORICAL
AND NATURAL HERITAGE OF CANTON SARAJEVO

sredstvima za upošljavanje novih saradnika, odnosno da je budžet planiran za 21 radno mjesto, a da trenutno u Zavodu ima 11 stalno zaposlenih radnika i 3 radnika zaposlena na određeno vrijeme. Članica Upravnog odbora, Elša Turkušić, sugerirala je otvaranje Zavoda prema drugim institucijama i interesnim stranama kroz razne vidove saradnje. Direktor je obrazložio da se određeni dio planiranih projekata i realizira kroz saradnju sa različitim akterima. Članica Upravnog odbora, Mirsada Škrijelj, sugerirala je da se kroz prikaz pojedinačnih aktivnosti daju finansijske procjene. Direktor je obrazložio da se prilikom izrade dokumenta rukovodio prethodnim programima rada, te da je finansiranje ovih stavki kumulativno prikazano kroz finansijski dio Programa rada. Nakon završetka diskusije, članovi Upravnog odbora su jednoglasno usvojili Program rada sa finansijskim planom za 2022. godinu.

AD – 3 Direktor je upoznao prisutne sa problemom trenutačne podkapacitiranosti Zavoda, pojasnio je da Zavod od nekada 24 zaposlena, danas ima 11 stalno zaposlenih radnika i 3 na određeno vrijeme (na 10 i 12 mjeseci). U protekle tri godine Zavod je ostao bez deset radnika (9 penzionisanih, 1 preminuo), a u sljedeće 2 do 3 godine očekuje se penzionisanje još 4 radnika. Pored poteškoća sa nedostatkom stručnih saradnika iz oblasti zaštite baštine, a što se posebno odnosi na oblast zaštite prirodne baštine, gdje trenutno postoji samo jedan radnik zaposlen na određeno, veliki problem predstavlja nedostatak saradnika za pravne i ekonomske poslove, čime je oblast opštih poslova Zavoda također u lošoj situaciji. Trenutno je angažovana računovodstvena agencija, koja ne može u potpunosti odgovoriti na potrebe Zavoda. Zbog ovakve situacije, rad institucije je poremećen i ugrožen, te je sa trenutnim brojem radnika izvršavanje poslova iz osnovne djelatnosti Zavoda otežano. S tim u vezi, direktor Zavoda daje prijedlog za upućivanje Zahtjeva za izdavanje saglasnosti za prijem radnika u radni odnos na neodređeno i određeno vrijeme Ministarstvu kulture i sporta KS. Zahtjev podrazumijeva popunu pet radnih mjesta na neodređeno vrijeme (Stručni saradnik za dokumentacionu građu, Stručni saradnik za zaštitu prirodnih vrijednosti, Portir - domar, Stručni saradnik za pravne poslove i Viši stručni saradnik za zaštitu arheološkog naslijeđa) i četiri radna mjesta na određeno vrijeme (Stručni saradnik za finansijske poslove, Stručni saradnik za zaštitu graditeljske baštine- dva izvršioca i Stručni saradnik za lektorisanje i odnose sa javnošću). Nakon rasprave, Upravni odbor jednoglasno donosi zaključak o prihvatanju teksta Zahtjeva za izdavanje saglasnosti za prijem radnika u radni odnos na neodređeno i određeno vrijeme, te se isti proslijeđuje Ministarstvu kulture i sporta KS.

AD – 4 Direktor je upoznao prisutne da je na Pravilnik o unutrašnjoj organizaciji i sistematizaciji radnih mjesta JU "Kantonalni zavod za zaštitu kulturno-historijskog i prirodnog naslijeđa Sarajevo" broj 11560-4/21JU data saglasnost Vlade Kantona Sarajevo, te da je isti stupio na snagu. S tim u vezi određena radna mjesta su prestala postojati, odnosno izmijenjeni su uslovi utvrđeni za pojedina radna mjesta, te na osnovu člana 66. Pravilnika, direktor treba izvršiti raspoređivanje radnika na radna mjesta za koja ispunjavaju posebne uslove u Javnoj ustanovi u skladu sa važećim radnim zakonodavstvom i odredbama ovog Pravilnika. U skladu sa navedenim, direktor obavještava Upravni odbor o potrebi dobivanja saglasnosti za ponudu izmijenjenih ugovora o radu za 10 uposlenika Zavoda. Članovi Upravnog odbora jednoglasno donose zaključak o prihvatanju teksta Zahtjeva za izdavanje saglasnosti za ponudu izmijenjenih ugovora o radu uposlenicima JU "Kantonalni zavod za zaštitu kulturno-historijskog i prirodnog naslijeđa Sarajevo", te ga upućuju na dalje postupanje Ministarstvu kulture i sporta Kantona Sarajevo.

AD - 5 Upravnom odboru je obrazložena neophodnost usklađivanja Pravilnika o radu Zavoda sa odredbama Uredbe o postupku prijema u radni odnos u javnom sektoru na teritoriji Kantona Sarajevo („Službene novine Kantona Sarajevo“, broj 19/21), čijim je donošenjem prestala važiti Uredba o postupku prijema u radni odnos u zavodima, agencijama, direkcijama i upravnim organizacijama, pravnim licima sa javnim ovlaštenjima na teritoriji Kantona, Grada ili Općine, u javnim ustanovama i javnim preduzećima čiji su osnivači Kanton, Grad ili Općina, te u privrednim društvima u kojima Kanton, Grad ili Općina učestvuju sa više od 50% ukupnog kapitala („Službene novine Kantona Sarajevo“, broj 9/19 i 21/19). Nakon kraće rasprave, konstatovano je da je Upravni odbor saglasan sa tekstom



**KANTONALNI ZAVOD ZA ZAŠTITU
KULTURNO-HISTORIJSKOG I PRIRODNOG NASLIJEĐA
SARAJEVO**

INSTITUTE FOR THE PROTECTION OF CULTURAL-HISTORICAL
AND NATURAL HERITAGE OF CANTON SARAJEVO

Pravilnika o radu Zavoda, te da se za donošenje odluke o usvajanju istog pribavi mišljenje Sindikalne organizacije „Kantonalni zavod za zaštitu kulturno-historijskog i prirodnog naslijeđa Sarajevo“.

Sjednica je zaključena u 19:00 h.

Zapisnik pripremila
Selma Karačević-Kapić

DOSTAVITI:

1. Ministarstvu kulture i sporta Kantona Sarajevo,
2. članovima Upravnog odbora 5x,
3. direktoru,
4. arhivi UO,
5. arhivi Zavoda.

Predsjednica Upravnog odbora

Azra Koldžo

